

Brčko Distrikt proslavio četvrtu godišnjicu

Danas je supervizor za Brčko, Susan R. Johnson, u Kancelariji za implementaciju Konačne odluke – OHR, dočekala više od 40 uvaženih zvanica, uključujući visoke državne zvaničnike, ambasadore stranih zemalja u Bosni i Hercegovini, i predstavnike međunarodne zajednice, koji su u Brčkom obilježili četvrtu godišnjicu osnivanja Brčko Distrikta Bosne i Hercegovine.

Zvanicama su se obratili gradonačelnik Brčko Distrikta, Branko Damjanac, zamjenik gradonačelnika, Ivan Krndelj, i predsjednik Skupštine Distrikta, Mirsad Đapo. Oni su obišli kompleks zgrada suda i luku Brčko, sastali se sa predstavnicima privatnog sektora u Brčko, te bili gosti na zvaničnom prijemu u organizaciji Vlade Distrikta u hotelu "Grand Posavina" Brčko.

Supervizor za Brčko, Susan Johnson, je ukratko informisala goste o statusu Brčko Distrikta i ulozi supervizora u provođenju Konačne odluke za Brčko. Gradonačelnik Damjanac, zamjenik gradonačelnika Krndelj i predsjednik Skupštine Đapo održali su prezentacije o privrednom razvoju i reformi, zakonodavnim prioritetima, reformi javne uprave i izborima.

Poseban dio ceremonije bila je posjeta luci Brčko, gdje su gosti obišli nedovoljno iskorištene kapacitete koji su prije rata činili Brčko jednom od najvećih i najznačajnijih luka u regiji. Direktor Luke Brčko je gostima govorio o istorijatu Luke i njenom sadašnjem statusu, a gradonačelnik Damjanac o budućim planovima za restrukturiranje Luke i multilateralnoj inicijativi Pakta za stabilnost jugoistočne Evrope, čiji je cilj ponovna uspostava plovidbe i revitalizacija bazena rijeke Save.

"S ponosom mogu istaći da je Brčko Distrikt u protekle četiri godine ostvario uspjeh kojim se mogu ponositi i svi ostali građani Distrikta. Uspjeh je rezultat napora svih građana Brčko Distrikta, domaćih institucija i velikodušne podrške OHR-a. Uvjeren sam da uslovi koje smo stvorili predstavljaju dobru osnovu da organi koji budu izabrani na izborima dalje razvijaju Distrikt i obezbijede prosperitet u budućnosti svojim građanima, posebno omladini", rekao je gradonačelnik Damjanac.

"Ovo je bila prilika da se osvrnemo na značajna ostvarenja u protekle četiri godine i postavimo osnovu za sljedeću fazu u razvoju Brčko Distrikta", izjavila je supervisor Johnson.

"Priznanje i pažnja koju je Brčko Distrikt dobio odražava kako dostignuća Distrikta tako i njegove potencijale. Ne samo da je vrijeme da Brčko izabere svoje organe vlasti nego i da više usmjeri pažnju na svoje uključivanje u glavne tokove privrednog i političkog života u BiH. Brčko Distrikt će nastaviti da ulaže napore ka jačanju svojih veza sa državom i državnim institucijama, kao i entitetima i susjednim državama u regionu."